

丁文誠公奏稿

丁文誠公奏稿

卷之十六目錄

考核官引票釐各局徵收款項片

光緒五年二月初八日

防勇口糧應於護本引底各項餘款撥抵片

光緒五

年二月初八日

耗鹽儘數歸公片

同日

遵旨覆陳寶森實績摺

光緒五年二月十二日

拏獲穆坪首匪王萬春摺

光緒五年二月十二日

請頒官運鹽局銅質關防摺

光緒五年二月十二日

降級留任謝恩摺

光緒五年三月初十日

黔邊邊計各引由局自行繳殘片

同日

請將竈紳王余照革職提審片

同日

官運辦有成效未可更改摺

光緒五年閏三月初七日

會籌西藏事宜摺

光緒五年閏三月初七日

遵旨覆陳方濬頤不能勝任摺

光緒五年閏三月初七日

報銷都江堰工用款摺

光緒五年閏三月十七日

遵旨查訊竈民呈控官運虛誣摺

光緒五年四月初五日

遵旨覆陳都江堰工並無浮冒摺

光緒五年四月初五日

考核官引票釐各局徵收款項片

光緒五年二月初八日

再川省饒項津捐而外全恃鹽釐而鹽釐一款計通省只收銀九十餘萬兩臣心竊疑之因查明鹽務從前富健各廠商人領引配運皆以邊計潼錯雜套搭不清朦混滋弊乃於開辦黔邊之後奏明於該廠改設官引票釐各局以嚴考查而資整頓現已一年期滿臣逐加考核除黔邊官運局應銷光緒三年正額邊引及近邊十三廳州縣計引一律全完並帶銷黔邊積引已及八成所徵正款稅羨截釐銀計六十四萬九千餘兩而雜款所收之黔釐引底護本並自行籌備安定營防邊勇糧及局中公費暨奏明提作道府公費之積湊平餘共銀三十餘萬兩尙不在內較

之未辦官運以前邊楚兼行每年銷引不過七八千張多銷幾及三倍現經另行奏咨核銷其改設之富榮官引局查從前邊計潼三項引張套搭領配每年所銷濟楚潼引不過二千數百張合之邊計各引每年行銷至多不過一萬六千餘張自光緒三年十一月開設官引局起至四年十一月底止一年期滿除黔邊引張全數提歸官運局認銷外現查官引局潼引一項實已銷過九千六百六十餘張計多銷潼引七千餘張合之計商已投驗之引六千四百八十餘張共計潼計兩引行銷亦已至一萬六千一百四十餘張共收釐銀二十九萬七百餘兩連潼引項下徵完稅羨截銀八萬四千三百餘兩二共收銀三十七萬五

千零二十兩是全除邊引一項其所銷引數與所收銀數已與往年相埒若連官運局所銷丁丑綱邊引併計收數實較從前倍加至隄樂官引局所收釐銀除去邊引歸官運不計外實收銀至十萬七千九百九十餘兩亦較從前邊計兼行收數加多又查渝城鹽釐局爲運楚商鹽及下游邊計各局運鹽總匯之區向來運楚每引完釐銀三十兩五錢邊計兩商每引完釐銀二兩未辦官運以前渝局每年驗放邊計楚各引多不過一萬四千張收釐銀不過二十六萬兩自三年十一月將黔岸及近黔邊十三廳州縣計引改歸官運渝局專驗商運之潼引及下游未歸官運之各州縣商運計引因鹽包改歸舊則不准照

前任意加觔其時楚商皆以灘險費重銷路狹滯紛紛懇求酌減以顧成本臣查其情形屬實因鹽觔大包之弊已除釐數自應遞減方可以對商人當爲核減銀十二兩五錢每引完釐二十五兩邊計各商原定釐數本輕仍照前每引完釐銀二兩計自光緒三年十一月起至四年十一月止共驗過運楚潼引及湖北長樂八屬楚商鹽引一萬二千一百八十張下游各州縣計引五千四百七十餘張共收過鹽釐銀三十四萬二千零八十餘兩較往年銷引又多至二千餘張其運楚每引酌減釐銀十二兩五錢計尙多收銀七萬餘兩尤屬有盈無絀此改設官引局後富犍兩廠及渝城驗引收釐加多之實數也又查富犍等廠

向章抽收引外餘鹽釐金巴鹽每觔抽錢五文花鹽每觔抽錢四文彼時富廠所收餘鹽釐錢每年極旺不過十三萬串隄廠所收餘鹽釐銀每年亦不過一萬餘兩自上年改辦票釐收數核實因各處窮民過眾小本謀生餬口倍難乃酌減爲巴鹽每觔抽錢四文花鹽每觔抽錢三文以卹窮苦計富廠自光緒三年十一月開辦票釐之日起至四年十一月底止共抽收釐錢十五萬五千五百餘串隄廠自四年正月開辦起至十二月底止共收釐銀五萬七千五百餘兩是富廠酌減之後較從前未減時所收錢數加多至四萬五千餘串隄廠所收銀數則加多至四倍此又富隄各廠引外餘鹽抽收加多之實數也至此項釐金

連官運局收款均存儲該局添作本年開辦滇岸成本其
官引各釐局所收各款仍隨時分解鹽道庫在案竊查川
省鹽務自咸豐初年以來因滇黔邊岸全失部引滯銷已
越二十六七年此後邊計各引牽扯輻輳迄無考核雖經
前督臣駱秉章吳棠於同治二年八年兩次奏准展限勒
銷毫無實濟前經查明截至光緒二年年底止邊計各引
積至八萬數千張積欠羨截銀一百三十餘萬兩較之同
治二年原奏積欠羨截銀三十六萬餘兩幾增四倍良由
頻年邊計套搭引目混淆奸商巧於營私貪吏肆其需索
自充商領引開籤以至沿途盤驗到岸開包處處索費官
取於商不問

國計商取於鹽不知畏法故改包添勛任意加重配一包而載兩包之鹽行一引而夾數引之私其潼屬一處甚至鹽船經過盤驗委員不驗包重全係估堆官則估多以便索錢商則爭少以圖減費但將使費說定無論包重包輕卽便放行蔑視典章直同兒戲關卡賄賂公行私梟羣起爭奪於是官商私販互相齟齬沿江列艦排礮搶劫焚擄肆無忌憚莫可收拾臣到任後將潼屬嚴加整理又督同唐炯議辦官運定章奏辦力禁官吏之婪索嚴杜商人之夾私包勛改歸舊則爲之酌減釐金以救商窮邊計不容攙混爲之劃分引岸以清銷路一面飭派營勇實力查拏私梟由是引岸分明運路疏通商販暢行挑販窮民亦得

各安生理茲查明官運總局共收稅羨截銀二十萬三千兩有奇富榮官引局徵收潼引稅羨截銀八萬四千三百餘兩比較從前多收稅羨截銀約二十萬有餘又各局釐金除潼屬及各州縣小廠分局分收竈戶商販鹽釐不計外專以官運及富榮隄樂渝城數局收數銀錢併計已共收釐銀一百三十餘萬兩而官運局所收雜款之黔釐引底護本等項暨自行籌備安定營防邊勇糧並局中一應公費及積湊平餘等項均各有專支不在正款數內者又約銀三十數萬兩比較從前通省抽收鹽釐九十餘萬兩實已多收銀七十餘萬兩通計一年實已增收稅羨截釐及各雜款銀約九十五萬餘兩洵屬大著成效至 臣此次

辦理其銷引之日暢徵收之加多者並無分毫多取於商民甘犯古人聚斂之訓其得要全在禁鹽包之加餉而尤在嚴官吏之婪索蓋商人於鹽餉加重非不自知犯法徒以索費過多藉以塞其慾壑耳茲官吏不容婪索則商無浮費而成本輕成本既輕則既不樂犯法以加餉亦便不須擡價以取盈而民食賤故自官運開辦數月後臣查訪黔邊及近邊各計岸民間食鹽從前價貴至一百數十文者今則落至七八十文貴至七八十文者今則落至四五十文是以商民稱便引銷自多臣初與唐炯定議謂此次辦運要在以利民者利商卽以利商者利

國卽今可驗然此皆由唐炯心精力果守潔才明矢志公

忠破除情面故能興此大利不加賦而財自足若使無此贊助實非臣才力所能及此也伏念道光年間前兩江督臣陶澍以淮引積滯改辦票鹽其時

宣宗成皇帝力爲主持然猶謗議沸騰至於詛說况臣與唐炯碌碌庸才欲奪貪奸數十年之侵吞而又舉之於兵燹廢墜之後若非我

皇太后

皇上乾斷獨持於上臣等亦且相率畏難何能稍有建白迄今幸奏成效彌欽服

聖明在上百度維貞不禁感激涕零也現仍飭唐炯力守初意總期便商便民以濟川黔日後之窮以溥

國家自然之利冀以不負

委任於萬一所有開辦官運後改設引票各局辦理甚暢
各緣由除咨部查照外謹縷析附片具陳伏乞

聖鑒謹

奏

防勇口糧應於護本引底各項餘款撥抵片

光緒五

年二月初八日

再查官運定章內前奏明攤收引底一款經部議駁本應遵辦惟查此項引底係因各項商人向多領引入手不思認真行運私相售賣或呈請改代輾轉牽混故引張繳殘一切流弊滋多前籌辦官運以各該商此等弊混相習成風惟念其自咸豐以來屢次捐輸亦多報効今若遽令失其坐享之利殊覺不情是以奏明酌留引底以示體恤迨經部駁後該商等聞引底不給紛紛懇求殊形迫切臣查其情實可憫因令唐炯確核成本卽加引底一層亦屬輕減民食仍賤似可仍准酌留用昭公允至雜款內護本一

款係因官運鹽包均係船運自廠至岸江流奔激節節皆有險灘石齒森磷船隻觸碰時虞沈溺而仁涪綦永入黔河道灘尤險惡向來商人每年觸石沈溺船隻淹斃水手不一而足且因此虧折歇業者亦多是以商規向有護本一層以備不虞今官運成本攸關帑項尤宜格外慎重因仿照商規仍於成本內攤收護本一款以爲船隻疏失沈溺另行補運之費惟加此一款核之成本仍較商運猶多輕減於民食毫無加增商人皆樂於從事至黔釐一款則係商人以黔省釐卡紛煩處處需索自願將此款攤入官運成本由官代爲交納以免刁難阻滯之弊亦較之從前商運入黔自行完釐者減少不啻數倍商人咸相悅服銷

行甚暢職此之故至安定營勇防邊口糧本應由司庫動支正款給發因現在京協各饗指撥紛繁司庫入不敷出籌撥萬分拮据營勇時形枵腹唐炯目擊艱難乃詳請由局自行設法籌備不動地丁津捐釐金正款以顧大局其支發勇糧各項每年仍照動支司庫各營按月冊報籌饗局歸該局按年造報俾資考核而昭清肅至此外局中一切應需薪水公費各項均由局自行酌量籌畫並不准於稅羨截釐正款內扣支分文其奏明提作道府公費平餘一款係於購鹽售鹽內分釐湊積而成亦於稅羨截釐各款無涉均應免造報以歸簡易再安定營勇防邊口糧爲費較多恐自行籌備之款設有不敷應只准在於護本引

底及黔釐平餘各項積存餘款項下撥抵俾免缺乏除咨
部查照外謹分晰附片具奏伏乞

聖鑒謹

奏

耗鹽儘數歸公片

光緒五年二月初八日

再臣前以黔邊鹽局詳稱官運鹽包奏定酌加滷耗鹽十觔原以備鹽包折耗之用現查歷次所運之鹽折耗實屬無多應請奏明全數歸公核算以昭核實臣時以該局現在開辦滇邊所需一切運費局費爲數較多籌辦爲難因奏請將滷耗十觔以八觔歸公提出二觔暫行留備局中公費以資津貼在案茲復據道員唐炯詳稱該局此次辦理官運實事求是略無絲毫牽混所以杜日後流弊若以此二觔耗鹽酌留津貼則核算鹽包觔重時頗滋輻輳且易開將來朦混侵漁之竇仍令全數歸公方爲正辦懇請再行奏明辦理臣查該道係爲核實杜弊起見自應准如

所請以昭清晰除咨部查照外謹附片具陳伏乞

聖鑒謹

奏

遵

旨覆陳寶森實績摺

光緒五年二月十二日

奏爲道

旨覆陳恭摺仰祈

聖鑒事竊

臣

恭奉

上諭翰林院侍講張佩綸奏稱四川候補道寶森係大學士寶鋆之弟特膺保薦恐以虛譽邀恩寶森著有何項實績著該督據實覆奏毋稍迴護欽此仰見

聖主綜核名實至意跪誦之下欽服莫名伏查

臣

前籌辦

馬邊夷務正未得手適寶森進省來見

臣

詢以該處情形

據稱馬邊城數里以外卽被夷人侵占數十年來爲患日甚此時用兵雖日有斬擒亦屬無裨大局必須規復沙匪

奪其老巢羣夷必望風瓦解然該處山路峻險進兵甚難
須從左右營舊址分路進搗機密迅速於數日內蕨功若
稍延緩該夷因險設卡必至無可著手臣以其言明晰近
理密令馬邊同知周儕亮查覆情形大致相同因卽決策
添派李培椿一軍會同張祖雲一軍分路克復沙匡羣夷
遂卽納款臣以該員既能直抒所見亦尙能耐勞苦於事
平之後照常附片保奏至寶森他事就臣所歷加考核者
謹亦略陳梗概臣初到蜀深悉夫馬局虐民最甚卽擬裁
撤因積弊過久食利者多未敢驟行舉動維時寶森先經
前署督臣文格委署建昌道尙未到任謁見之次卽首陳
夫馬之害力請裁撤及其稟辭赴任臣又語及此事寶森

卽稟稱立法必自本省大員始此次赴任應痛革此弊如有絲毫擾累民間應請嚴行參處此在臣札飭未下之時寶森卽已屏除供應奉法順流其急公自屬可嘉又穆坪土婦爭印謀嫡一案事閱三年奇冤莫雪且釀成王萬春叛逆之禍臣委該員審辦既查出實情卽來省面稟並稱此案懸宕數年皆由被告廣行賄賂固結甚深向來自督署以至建昌道衙門書吏丁胥無不爲之耳目若能清各署之弊此案亦自水落石出臣查所言有因卽照該員辦理遂將此案審結臣觀其極能奮勉似非有意迎合因參核其向來在川情形該員兩經署任爲時甚暫辦事亦無貽誤惟於同治九年委辦夔關釐務此事向爲調劑美差

抽收報解漫無考核寶森接辦此局已在洋票漸盛之時核其征解之數與前三年比較必逐月加多合計一年長解七萬數千餘兩此在臣未到任以前卽能如此前後自屬相符因其於馬邊案內有勞足錄酌予保舉原以勵其將來臣惟疆吏督率屬僚但當講求實效導養善機實事既有可取則誘掖獎勵原以廣爲善之端此後寶森回省當差果能始終奮勉臣當迭加保獎未便以曲避微嫌沒人之美如其不知自愛先後不能一轍亦當據實參劾決不以保舉在先稍存迴護謹恭摺覆陳伏乞

皇太后

皇上聖鑒訓示謹

奏

拏獲穆坪首匪王萬春摺

光緒五年二月十二日

奏爲官軍擒獲穆坪滋事首匪王萬春訊明辦理餘匪悉數殲除坪地一律肅清恭摺具陳仰祈

聖鑒事竊查雅州府天全州屬穆坪土司所轄夷地於光緒二年夏間有匪徒王萬春卽王唆唆因護理土司大堅包氏身死不明其女格松蒼汪珠瑪等與庶母小堅包氏構訟遂乘機煽惑糾衆倡亂焚掠殺擄拒傷官兵經前護督_臣文格調派兵勇勦捕擒獲王萬春悍黨靳教司卽靳超羣車軍功卽車添順等審明正法王萬春逃竄未獲均經奏報在案_臣寶楨三年三月到任後探悉王萬春盤踞夷地趕羊一帶勾脅居民滋擾無常當派候補知府張世

康督率所部達字左營前往分紮穆坪靈關兩處督同天全州知州戴希灝蘆山縣知縣劉建埜設法勦辦詎該匪王萬春盤踞夷地既久勾結甚深該處漢奸土民被其誘惑悉聽號令動至數千日形猖獗雖疊經飭兵進勦而山深地險總未能大加懲創臣等隨即擬就祇擒渠魁罔治脅從簡明告示刊刷多張札發張世康及署建昌道薛允升派員持往坪地各村徧貼曉諭以期解散黨與一面添調統帶壽字副前營記名提督李鳳友督率所部前往會辦是時坪地居民有被逼勉從及隨同附和者一經剴切示諭漸知悔悟解散頗多而該匪王萬春於三年八月間仍糾集死黨多人由趕羊一帶竄踞隴東四路要隘修築

堅卡爲自衛計並令另股匪黨亦於趕羊築寨固守遙爲聲援張世康探悉情形深恐竄入內地蔓延爲患隨於八月初五初八十一等日派都司李鴻順等會同李鳳友部勇並飭代理土司周汝紹團首黃存齋等前往勦捕王萬春率衆抗拒張世康督飭各弁勇奮力進擊敗賊於隴東追至趕羊復將蜜蠟溝塘壩一帶踞賊夾擊敗潰十二十三及二十五等日都司李鴻順守備駱宗保等攻賊於楊村瓦西等處賊復敗遁先後斃賊百餘名陣擒王萬春之姪王糟鼻子及悍匪王觀音等十一名均立於軍前正法奪獲軍火刀械多件我軍受傷勇丁李玉培等九名陣亡把總樊芳雲一名勇丁廖占彪一名團民七名團首從九

職銜王世珍亦沒於陣維時梅里川等處踞賊亦經李鳳友擊敗先是張世康等因王萬春逃匿趕羊匪蹤靡定曾令團民陳富有冉照庭楊忠林劉稷匠楊老七等爲官軍鄉導入山勦捕王萬春銜恨甚深分遣匪黨將陳富有冉照庭兩家老幼共十三丁口全行屠戮而楊忠林劉稷匠楊老七等亦在青岡坡遇賊全行攢殺並將遣入賊巢招撫團民羅樹棠殺害旋經巴石溝等處團民查獲從賊殺人之羅傳勛等六名捆獻來營當卽訊明正法李鳳友等隨卽商同管帶團勇左營參將司錦榮各率部勇並約會署建昌道薛允升署雅州府羅亨奎督飭天全州戴希灝蘆山縣劉建塏毘連坪地之汶川雅安蒲江邛州打箭鑪

懋功等廳州縣經歷王聿英各帶民團懋功阜和兩協督同各營弁兵四出圍捕陸續擒獲夥匪王二大偽軍師周伯章暨王萬春之子王老五等三十七名訊取確供其實係匪黨卽行正法若係被脅勉從者均立予保釋所有逃出難民約千餘人均經資遣回籍其由賊中自拔來歸者亦一併免罪並示諭各安生業其前經被賊燬擄者尤爲加意撫綏以示矜恤等情據各營員與各地方官先後稟報前來臣等查王萬春人本狡黠詭譎異常句結旣深藏身甚固若勦捕少形鬆懈竊恐滋蔓難圖儻派兵徧地搜勦又恐羣相驚疑該匪益肆言煽惑當飭張世康等先將解散之衆就地力行保甲勤加稽查以絕句連一面飭令

勇營擇要設防嚴杜竄越旋據張世康等稟報會同各地
方官督飭代理土司周汝紹將穆坪轄境漢夷戶口認真
清查一律編聯其各處要隘或派營勇駐防或調團民扼
守亦均布置周密使王萬春不能偷越四面兜擒庶易得
手乃正在嚴飭查拏聞王萬春見備禦嚴緊自知無可逃
遁而保甲旣辦亦難再行煽惑遂勾結外匪朱映川等招
集亡命急圖起事從前漏網餘匪聞風響應遂於四年七
月間王萬春潛令巨匪朱映川等從靈關一帶程同喜等
從太坪場一帶羅老十等從大溪腦一帶包文炳等從河
東河西一帶蕭老五等從趕羊隴東梅里川一帶各糾匪
黨約定頭插扁竹葉以放火爲號定期分道搶踞坪地再

行分竄張世康得報後當卽飛飭駐坪都司田錦德等約會提督李鳳友及附坪各廳州縣嚴密巡防又知會代理土司周汝紹協力守禦一面飛稟臣等添調管帶親兵都司劉功化督隊會同防勦七月十六日夜三更後該匪等果分股由四山突出直撲穆坪中街放火殺人火光照耀喊殺連天都司田錦德等督帶勁勇分股巷戰是時四路守隘弁勇團丁由外擊入一面分隊撲滅燒房之火田錦德等由內迎敵格殺多時陣斬悍匪呂天福等六名賊稍敗卻我軍奮勇力戰生擒石雞籠等九名皆頭插扁竹葉爲號奪獲刀矛無數餘匪乘夜潛逃其冷卜溝札底關校場溝各處股匪或由山梁馳下或由僻徑抄出均經預派

堵隘弁勇擊退時梅里川股匪亦於是夜起事焚掠國民
徐世賢葉文玉各家殺傷男婦數人張世康派都司王有
等帶隊馳擊匪等據險抵敵王有奮力奪險斃匪羅正興
等三名餘皆狂竄王有旋督團保抄獲夥匪楊盡春等多
名張世康因賊雖敗竄伏莽猶多隨派哨長知縣段興宗
等並會商提督李鳳友派壽字營參將胡升仕都司劉功
化署天全州耿士偉蘆山縣劉建塏或統率部勇或帶領
兵役或督同團練查探匪蹤分路巡緝先後拏獲要匪朱
映川等及夥匪朱王保等六十五名稟經臣批飭訊明法
無可貸者立即正法情有可原者准予保釋其時王萬春
仍復乘間逃逸復飭張世康等嚴行偵捕並派統帶游擊

營傑勇候補知縣王宮午幫同查拏旋據稟報王宮午商同前任天全州戴希灝購覓穆坪土民王昌林等六人作爲眼綫派令軍功吳級三等改裝易服前往訪緝十月初三日先在魚通土司境內拏獲王萬春心腹鄭木匠鄭占魁父子經王宮午會同戴希灝提訊據鄭木匠等供出王萬春尙在田壩花椒坪地方藏匿同行三四十人分伏數處並稱甘願指引路徑將功贖罪同往兜拏等語王宮午等見其出於至誠當卽密飭千戶王應元嚴扼路通草地各隘並函請張世康嚴扼猛虎岡桃坪兩路署天全州耿士偉嚴扼阿迷羅一路復遣獲賊鄭占魁馳赴花椒坪假與王萬春報信同逃實則暗爲內應約定初五日夜間以

礮聲爲號內外夾擊鄭占魁去後王宮午卽派守備謝文
壽把總費賡良密帶勇丁晝伏夜行初五日夜四更時分
齊抵花椒坪鄭占魁從內將草棚放火王萬春與匪黨倉
皇驚起持械抗拒我軍奮勇迎敵礮傷夥匪兩人王萬春
同餘匪向雞毛岡草地奔竄吳級三等伏路攔截匪黨墜
巖死者數名奪獲鳥槍五桿大刀三把勇丁石奉先等受
傷三名王萬春越嶺宵遁費賡良等追躡及之維時王應
元亦帶土兵瀘定橋巡檢陳熙亦帶弓兵圍丁隨後踵至
四路圍拏費賡良首將王萬春生擒鄭占魁亦隨隊馳回
其餘各匪均經張世康等督隊攻勦殲除淨盡坪地一律
肅清等情稟經臣批飭署建昌道周廷揆署雅州府于宗

綬飛飭代理土司周汝紹傳集土目包良金土民楊富貴等四名取具切結認明實係王萬春卽王唆唆正身押解到省臣等復令張世康覓出前與王萬春熟識數人當堂指認不誤當經發交成都府監禁訊供稟辦至鄭木匠父子先雖從賊迨拏獲後隨卽供出首匪王萬春所在並隨同官軍出力指引路途將其擒獲尙知悔罪自應貸其一死以勵將來此次該匪王萬春糾衆倡亂時閱三年各營將領及地方文武各員均能不避艱險轉戰於重山峻嶺之中防勦於瘴雨蠻煙之地卒使元惡就擒邊圉乂安洵屬著有微勞所有在事尤爲出力各員相應仰懇天恩從優獎勵其餘出力員弁紳團由臣查明酌給請獎

以示鼓勵出自

逾格鴻慈至力戰陣亡各員情殊憫惻應請

敕部照陣亡例從優議卹以慰忠魂其餘帶傷營勇團丁
由臣等按照等第給賞並飭查明被賊殺害團民丁口彙
案請卹所有官軍擒獲穆坪滋事首匪王萬春並餘匪悉
數殲除坪地一律肅清各緣由謹合詞恭摺具奏伏乞

皇太后

皇上聖鑒謹

奏

請頒官運鹽局銅質關防摺

光緒五年二月十二日

奏爲邊岸鹽局款鉅事繁責任至重擬請由部頒發銅質關防以昭信守並請以後承辦局員應於候補各道員內揀委先行出考奏明以專責成恭摺仰祈

聖鑒事竊查瀘州設立官運局創辦黔邊鹽務一年以來已著成效現復添辦滇邊並附近滇邊之各廳州縣計岸地勢旣屬寥闊事務倍極紛煩挈領提綱措置匪易而每年應行邊計正額引張並帶銷以前積滯各引約數萬紙其應徵之稅羨截釐及應行籌備之防邊勇糧公費各款約計一百數十萬兩其入款一項幾與司庫之地丁稅羨津貼三項相等是其款項繁鉅實爲川省大宗况現在撥

抵京饒及滇黔各省捐款尤須規畫久遠非暫顧目前之急可比且事涉三省文移往來動關緊要年中應辦報銷冊結各項尤與尋常局務僅司收支者不同事體既極重大若僅用一木質關防誠不足以資信守擬請

旨飭部鑄造銅質滿漢篆文四川辦理黔滇邊計鹽務局關防一顆頒發該局應用俾昭慎重至該局款鉅任重且事涉經始不比藩鹽各庫一切均有成法可遵全在審度時勢因地制宜以期推行盡利若非得操守謹嚴條理精密而又明足以察奸貪毅足以除瞻徇者承任其事辦理必不勝任擬請嗣後該局每遇更換局員應於通省候補道員中揀擇實在經練可靠之人先行出具切實考語奏

明委辦以專責成不准視爲調劑差使庶已成之功不致廢棄而

國家自然之利亦可垂諸永久實於今日事勢大有裨益
臣爲慎重財賦起見是否有當謹恭摺具陳伏乞

皇太后

皇上聖鑒飭部核議施行謹

奏

降級留任謝

恩摺

光緒五年三月初十日

奏爲叩謝

天恩恭摺仰祈

聖鑒事竊

臣

接准吏部咨該部具奏

臣

於隄工要務辦理

乖方欽奉

諭旨著交部議處應請照不應重私罪律降三級調用例
議以降三級調用前因革職留任在案今議降三級調用
處分應行革任於光緒五年二月十九日欽奉

上諭丁寶楨應得降三級調用卽行革任處分加恩著降
爲三品頂戴仍留四川總督之任欽此
臣跪讀之下感悚
莫名當卽恭設香案望

闕叩頭謝

恩伏念

臣

於隄工要務亟應悉心區畫慎重興辦方爲盡

職乃粗率從事以致被水衝刷迨經降

旨查詢又未能據實覆奏辦理乖方咎戾甚重乃復渥荷
聖慈仁施法外

曲予優容似此

破格之隆施實非夢想所敢及又况臣以知識庸愚迭蒙
矜宥不啻再三撫衷循省雖極殞身碎首亦未能圖報涓
埃此後惟有懷遵

聖訓益勵精勤庶幾勉竭駑駘稍贖罪愆冀仰答

高厚鴻慈於萬一所有

微臣

感悚下忱謹恭摺叩謝

天恩伏乞

皇太后

皇上聖鑒訓示謹

奏

黔邊邊計各引由局自行繳殘片

光緒五年三月初十日

再據黔邊官運鹽務總局建昌道唐炯等詳竊查四川鹽務甲年所行之引於乙年奏銷丙年繳殘歷歸鹽道辦理今將行黔邊引及近邊之敘永永甯瀘州納谿合江南川綦江江津涪州酉陽秀山黔江彭水十三廳州縣計引奏改官運自應由局繳殘惟丁丑綱銷引甚多內有運行到岸尙未發商之鹽所行殘引勢難一律繳齊應請援照向辦成案歸入己卯綱奏銷時悉數繳部以符舊章至總局所設聯票前經部議令將票根隨同殘引繳部查此項聯票每鹽一包填給商販護票一張每引用票五十張計本綱行引二萬三千八百餘道給票至一百數十萬張之多

所給票根汗牛充棟川省距京較遠長途盤運匪易腳費亦覺不貲應請免其送部以節糜費且此項護票係黔邊商販陸運時須折包駝載是以用此護票以爲該商等過境驗放之用與鹽法實無妨礙等情由官運局唐炯等請奏前來

臣

查該局所詳均係實在情形除咨部外理合附片陳明伏乞

聖鑒謹

奏

請將竈紳王余照革職提審片

光緒五年三月初十日

再富順縣自流井竈紳王余照係捐納候選道員倚恃富豪欺壓鄉里闔井竈商受其侵陵人人側目卽該縣地方官畏其勢力每遇控案均不敢深究前因奏辦井捐王余照竟敢率衆阻撓毀局經前署督臣崇實奏參革職拏辦在案迨井捐辦成後前督臣吳棠始准寬免並爲之聲請開復冀其悔過遷善詎王余照強鷙性成始終不改臣到川後熟聞其多行不義當飭地方官密查確情稟復並一面嚴爲諭導乃該紳怙惡不悛被控之案日多且所告多係私設引局抽收井釐侵吞公款並據富順縣稟該紳復估買已字民女爲妾其橫霸實難言狀臣迭次批飭鹽道

委員行提審辦而王余照竟藐抗不出意圖玩延似此在籍職員恃勢橫行目無法紀一方受制若不嚴行訊辦良懦何由得安相應請

旨將候選道員王余照先行革職以便臣委員前往勒提到省確切審辦以靖地方謹附片具奏伏乞

聖鑒謹

奏

官運辦有成效未可更改摺

光緒五年閏三月初七日

奏爲遵

旨查明川省鹽務官運甫經辦有成效未可更改致誤大計謹先行據實覆陳恭摺仰祈

聖鑒事竊

臣

於光緒五年三月十二日承准軍機大臣字

寄光緒五年二月二十八日奉

上諭恩承等奏川省官運局經竈民呈控多款請飭妥爲區畫或仍由官運或改官督商銷總期無虧成本實惠及民等語該省鹽務究應如何辦理方於國計民生兩有裨益著丁寶楨按照該竈民等所控各節確切查明嚴剔弊端體察商情或應仍由官運或應改官督商銷據實具奏

不准稍涉迴護該竈民等原呈著該督向恩承等咨取閱看欽此

臣跪讀之下仰見

聖主實事求是欽悚莫名伏查川省鹽務積弊甚深業經臣於開辦黔邊官運各摺內歷次陳明實無一字虛捏其開辦官運一切辦理章程均係力除夙弊爲疏引裕課利商便民至計亦經於開辦前詳晰奏陳咨部核覆上年十二月官運一年期滿例應奏銷復經臣將一年徵收稅羨截釐及雜款各項縷陳奏報並將冊結咨部核銷各在案竊臣開辦黔邊議設官運實爲川省力救時弊並隱爲黔省辦理招徠起見當甫經議辦之初誠以國家至計事體宏大未敢徇一己之見徇一人之私冒昧

從事致誤大局是以先行傳知各商到省諮詢利病然後與道員唐炯及熟悉川省鹽務各員將應辦事宜逐日集議籌畫確查弊端之所在曲體商情之所宜計自光緒三年四月起至八月底歷時五月之久諸凡審定知無滯礙至九月初乃敢奏定設局開辦創辦之初其難其慎如此至開辦後臣復隨時隨處體察凡有詳牘皆思之累日手自批答甚至徹夜不寐必期事歸妥協力圖百年經久之規茲據恩承等奏竈民呈控多款請飭妥爲區畫仰蒙聖諭令將官運及官督商銷情形查明據實復奏臣謹將二者得失情形兩相比較敬爲我

皇太后

皇上詳陳之查川省鹽務向章辦法商人領引配運則歸鹽道稅羨經徵則歸州縣而總督則考其成此則官督商銷之微意也夫官督商銷宜可以疏引而裕課矣乃至今考之積年停引至數十萬欠課至一百數十萬而已出未行之引及撥釐填補之課尙不知凡幾雖經前督臣駱秉章吳棠兩次奏明展限督銷而積引益多久課益甚空有督銷之名毫無行銷之實馴至私梟四塞商困岸疲因易而爲改代改配官吏藉此婪索商人遂違禁加觔計每引二百觔私加至三百數十觔及四百數十觔不等官以得其使費明知之而故縱之以致一引行兩引之鹽舉國視爲固然毫不知懼以致引張因之日滯課稅因之日絀則

官督商銷之有病於

國固昭然可睹矣又川省鹽務需索甚多商人領引配運則有費運鹽過關驗截則有費鹽舫到岸售銷則又有費而費之至重而無定者則尤在改代改配引張套搭此外如廠竈買鹽之欺詐江河行駛之覆溺船戶沿途之偷賣私梟糾衆之搶奪不與焉夫商人持本求利先則自顧成本次則希冀獲利至使費過重則商力不支於是將前之花費者轉而取償於加舫而加舫又屬違例關卡倍肆留難於是加舫猶不足以獲利又因而取盈於民食此種弊端作之者商人而所以使之作者全在官吏則官督商銷之有病於商與民又昭然可睹矣况所謂官督商銷者必

須各岸皆有正商各商皆歸本岸乃可按名而督今川省
口岸半多廢弛不惟黔滇荒廢之處無本商可指卽本省
計岸各商皆時時更易現在商多歇業卽屢飭地方官招
募承認竟有十餘年無一應者是旣無商可稽官雖欲督
之究從何而督之此又官督商銷之徒託空言也自臣上
年開辦官運後本年奏銷核計邊計各額引已全數銷清
復帶銷積引至一萬餘張所收稅羨截釐及各雜款至一
百餘萬兩是皆以

國家無用之廢紙易而爲有用之正供而邊計各商無不
自以爲得利民閒亦無不稱爲食賤者推原所自蓋由官
運之事事核實所有商人從前一切無名使費悉予刪裁

而口岸又爲劃清銷路不相攙雜其自買鹽以至銷鹽凡以前廠竈侵欺之弊行運沈溺之險船戶偷漏之苦私梟搶劫之害全行埽除商人無絲毫受累而每引一張該商坐獲二十餘兩之利鹽價漲落則照市價公議核定由局懸牌曉諭萬衆共知故民間食鹽悉照定價承買而商人以各有自然之利亦不肯暗爲擡價是以自官運開辦以後民皆食賤而私梟因商鹽價可敵私別無可圖無能攙越相率斂迹是以官引日銷稅釐日旺實由於此則官運商銷之有利於

國與商民又昭然可睹矣又况官運之責任甚大如現在之道府公費十數萬皆取給於鹽務平餘不另籌款而自

裕是不病商而吏治賴以整飭京協滇黔各捐之抵撥皆取給於帶銷稅羨無待備捐而自足是不病民而饒項可以供支而安定營防邊勇糧每年節省正款饒項又約十餘萬凡此亟需之款試問之官督商銷能乎否乎臣恐其必不能也且部議復淮已數年矣夫部臣之定議復淮者原因兩江督臣沈葆楨奏明令淮商籌銀數十萬以助川饒而復淮之後又令於平善壩設勇以杜川私合計二者所費已不下一百數十萬兩臣深念復淮本爲至計而竊慮淮商籌助川饒其事甚難至平善壩設勇杜私其患且不可測是以於上年覆奏復淮摺內曾經附片奏明容俟臣開辦黔邊三四年後銷路大暢俾楚商有生計可圖然

後漸次導之入黔庶兩淮無助饟之苦鄂省無設勇之費
斯爲善計現在黔岸辦理甫經就緒滇岸亦已舉行事機
已有可爲臣前復奏明於涪綦入黔河道開鑿險灘俾利
商運以備黔岸暢銷卽徐導楚商歸彼冀復淮岸於無形
現在又准部咨催辦此而問之官督商銷能乎否乎臣又
有以決其必不能也臣竊維鹽務一事官督商銷則不能
行官運官銷則不可行至官運商銷則是權操之上利溥
之下尙爲公允蓋官督商銷則一切之規費旣不能少亦
不能查其利全歸於官吏奸商而

國計民生同病此川鹽已往之前車可鑒矣官運官銷則
利權歸之於官而轉以阻小民謀生之路其弊必極於涸

克而

國與商民均不受其利此臣前曾計及之而不敢妄行者也至官運商銷則官商之情通官欲作一弊而商不願從商欲作一弊而官卽示禁彼此可以箝制弊竇無自而生惟官運則引由局配鹽由局運而商只銷鹽無一切領引過關岸規各浮費大不便於貪污者之所爲是以怨極生忿故大肆其浮議以思動搖耳然臣受

國厚恩身膺疆寄興利除弊事期有成

朝廷之所以責

臣者在此卽

臣

之所以力求盡職以圖報

稱者亦在此決不敢以浮言而昧大計厯蒙

聖明俯鑒愚忱部

臣

又復洞悉情事俾

臣

得所措手一無

牽制日前奏銷辦出成效已收私衷竊幸每與唐炯議及謂非

聖人之主持於上不克臻此竊不禁感激奮發也至該竈戶所控各節臣已向恩承等咨取閱看情詞實爲矯強且經訪聞係富廠一二奸竈恃富豪霸習慣自然深恨官運之利於商民不便已私故捏詞以爲聳聽阻撓之計若使官運果有不便則官運交涉之處尙有犍射兩廠何以並無一名呈遞卽富廠竈戶不下千餘家亦不聞有人出名至於商人則黔邊及近邊十三廳州縣計岸不下一二百家亦未聞有一人呈訴而本年開辦滇岸告示一出認岸之商數日內已有二十餘家繳本領鹽異常踴躍如果官

運不便則該商等必有鑒於黔邊之害羣相裹足不肯自蹈湯火矣今各處竈商均無異詞獨此數名呈控其情亦大可見臣現已委員前赴該廠提集該竈戶等來省虛衷查訊明確核辦容俟訊有實情再行據實奏明辦理茲謹將官運現已辦有成效未可更改各情形先行覆陳仰慰宸廑再官運上年領行銷極爲暢旺方期本年更有起色乃自有官督商銷之說浮論紛起黔邊各商羣懷疑畏以致正二三三月銷數頓不如前此則關係大局並各岸委員分銷考成殊非淺鮮臣現已出示曉諭各商令其照常行銷萬不可輕聽人言自誤生理但望該商等見有此示行銷能照前踴躍則所定抵撥京捐各餉及勇糧公費

各款均不致誤實爲大幸然卽此以觀臣等辦事之難至此已極不免私心惴惴耳現在事機甚順惟祈

乾綱獨斷但責臣等以實效俾臣與唐炯暨各委員共矢

清白慎始圖終庶

國家自然之利不致隳於垂成臣雖身爲怨府亦不敢避

又况騰口者要不過十餘輩貪奸之徒於臣亦毫無所損

也所有官運鹽務現已辦有成效應仍由官運未可更改

致誤大計各情形謹恭摺附驛先行據實覆陳伏乞

皇太后

皇上聖鑒訓示謹

奏

會籌西藏事宜摺

光緒五年閏三月初七日

奏爲遵

旨會籌藏中應辦緊要事宜恭摺具陳仰祈

聖鑒事竊_臣等於光緒五年三月十六日承准軍機大臣

字寄光緒五年二月三十日奉

上諭前已有旨將色楞額簡放駐藏幫辦大臣現在藏中
事務甚關緊要丁寶楨於藏中近日情形尙能講求該處
應辦事件如何相機整頓方能操縱合宜著色楞額就近
晤商該督先事籌畫務臻妥協等因欽此_臣等跪誦之下
仰見

聖主綏靖邊陲洞燭萬里莫名欽服竊維藏衛與川省唇

齒相依自西人有赴藏探路之約情事時虞變更臣寶楨
到川後每於該處情形沈思遠慮未嘗稍釋於懷茲蒙
諭令與臣色楞額妥商籌畫敢不竭忱盡智期於辦理無
誤稍紓

朝廷西顧之憂惟川省距藏六千餘里彼處情形誠恐未
能盡悉幸年來於派往藏中之員弁兵丁人等回川臣必
將該處近日情事詳加諮詢因得略知梗概伏查西藏地
方從前

祖

宗定制自察木多乍了至前後藏以及江孜定日各隘口
均設有遊擊都守兵丁以資駕馭而臨之以駐藏大臣居

中統制凡藏中事務其小而易辦者則由各該番官辦理
層次申送取裁於該藏王其大而難辦者則由該藏王咨
送駐藏大臣核辦卽其番官之揀補升除均須由駐藏大
臣主持辦理體統極爲尊嚴事權不容紊越所以控馭該
藏者立法至爲精詳是以二百年來番官頗受漢官約束
番人自不敢輕視漢番一體辦理一切令行禁止極爲順
手自道光末年以後撫馭稍寬番官因與漢官分而爲二
各不相統而番官之氣燄漸長其後習爲故常遂不復遵
漢官約束而漢官之呼應亦覺不靈惟駐藏大臣之體制
一切猶遵定制不敢違背然亦不免於羈縻矣今欲藏衛
之中事事就理則必仍令漢番合而爲一自可收提綱挈

領之效然積習已數十年番情固執難通一時恐難驟易
所幸該藏人情向惟知尊崇佛教別無伎倆其藏中應辦
各事經_臣寶楨詳加查訪俱係彼地之田土買賣命盜各
件居多其實在費手者則惟有彼此撒卡爭鬪之事然亦
係蠻觸相爭決無大患只須駐藏大臣恩威相濟處以公
平卽不難於了息故就藏中今日情形而論決不慮其爲
我心腹之憂特恐其貽我兼顧之累_臣寶楨復與_臣色楞
額詳細審度目前該藏應辦緊要事宜約有二端一在於
各國洋人之游歷無常一在於哲孟雄之藉端要索必能
於此二事調處得宜斯藏衛可期安謐而內地亦無虞攪
擾蓋藏地界連印度洋人久有窺伺之心徒以其爲我屬

境又值彼此講信修睦之時不得其閒而入耳觀於洋人探路之約既得所請而赴川游歷之人近日已十倍於往昔其中遇有赴打箭鑪一帶前進者臣寶楨均預飭該廳同知及各塘委員隨時查探如有入藏洋人必先婉言阻止決不令其輕入緣藏番不識時宜愚而自用設防閑不豫致洋人冒昧前進則藏番必一意膠執設有他事其釀禍將有甚於馬加哩者臣寶楨現與臣色楞額等畫以後凡有由川入藏洋人由臣寶楨隨時飭屬設法攔阻一面咨會查照妥辦第查各國游歷洋人近有由外洋及新疆別路入藏者此則無從防範必須駐藏大臣先得消息在於交界之處派員探迎或婉爲阻止或加意防護庶免失

事惟查藏中與各處交界處所並未設有官司實無從查探保護萬一來者銳意突來而阻者顛頊力阻彼時駐藏大臣或不及知卽知之而相距較遠事機莫及一有事故衅隙卽開則洋人必以其爲我屬境近則與彼構衅遠則與我爲難此係必然之事現臣等擬於藏中與各路交界之處擇要增設文委員二人歸駐藏大臣統屬專司稽查護送游歷洋人各事如遇有洋人由外赴藏者先行委曲阻止儻力不能阻則一面飛稟駐藏大臣一面力爲諭導藏番並親爲護送出入不少疏玩庶洋人之來藏者我可以先爲防範卽萬一有意外之事則我既有員保護彼亦無可藉口此則籌畫目前之第一要務也又哲孟雄地方

界在印度西藏之中近日探悉該番往往假披楞欺占彼地時向藏中生事上年頗有煩言經湫淮妥協辦理幸得無事臣寶楨細揣其情該番此時似意屬騎牆彼此播弄以爲漁利之計若不早爲籌及恐其外肆句結內挾欺陵將來洋人與藏中衅端必從此起臣寶楨查江孜定日地方本設有守備二員駐紮巡防惟武弁不能通達機宜殊不可恃現與臣色楞額籌商擬將新設稽查游歷洋人之委員二人或分一員住江孜與哲孟雄毗鄰俾其就近探查該處番情隨時隨事稽查彈壓如該番別有隱謀即可設法預爲解散俾不致暗中愚弄或可弭患未萌此又籌畫該藏之第一要務也至藏番雖崇佛法然其性情嗜好

實亦惟利是圖但使駐藏大臣事事持廉秉公恪遵法度
該番自能敬畏就我範圍此則正本清源之計臣寶楨亦
以此與臣色楞額互相勉勵以期正己率人不致爲所挾
持自不敢不遵我節制至察木多乍了等處聞近日亦漸
覺不馴然細查其由實亦彼此攘奪起見只須駐藏大臣
馭之以恩示之以信其有二三桀驁生事者亦必置之於
法不稍寬假自可誠服相安不致更滋他事此外該藏照
常應辦事宜則在臣色楞額到任與臣崧淮因時審勢斟酌
照辦別無可慮其餘有關大局者則由臣崧淮與臣色
楞額隨時飛行咨商臣寶楨亦必殫心會籌絕不敢稍分
畛域以仰副

聖主長駕遠馭之至意至所議增設委員二人究應分駐何處乃可扼要得力應由臣色楞額到任與臣淞淮詳細查酌再行奏咨辦理所有遵

旨會籌藏中應辦事宜是否有當謹恭摺由驛四百里覆陳伏乞

皇太后

皇上聖鑒訓示再臣色楞額現在趕緊料理行裝迅速起程應俟擇定行期再行奏報合併聲明謹奏

遵

旨覆陳方濬頤不能勝任摺

光緒五年閏三月初七日

奏爲遵

旨查明臬司不能勝任謹據實覆奏恭摺仰祈

聖鑒事竊

臣欽奉

上諭四川按察使方濬頤著丁寶楨悉心查看如竟不能勝任卽行據實參奏毋稍遷就欽此

臣

跪聆之下仰見

聖主整飭官方無任欽悚伏查臬司一官總理刑名而糾懸懲貪除奸禁暴尤其專責然必先有嚴正廉毅之風庶期勝任而愉快況四川人情浮夸吏治頑鈍盜風甚熾獄訟繁多尤賴執法之人持廉秉正遇事果斷有爲乃可以資整飭茲查臬司方濬頤性近優柔習尙瞻徇其於發審

各案情事稍涉繁難者輒日久延擱不能督率研訊平情
執法迅爲辦理及面加催促猶多濡滯不決而於官吏復
多寬縱臣隨時誠勉冀其漸知悛改乃日引月深竟無振
作之氣至川省總督兩司向均收節壽陋規謂之滿堂紅
名目極爲卑鄙臣以上下交征吏治因之日壞到任後卽
與該司等共相誥誡嚴禁收受並懸牌曉示又因臬司辦
公拮据未便強所難能隨與藩司及鹽道等爲之從優籌
攤公費以資津貼乃近日查知該臬司於支領公費外仍
復照前收受陋規屬吏紛紛滋議竟非無因竊維上年迭
奉

明諭飭令各省督撫兩司嚴裁陋規至爲嚴切當此澄敘

官方之日該臬司竟不知猛省其何以副責任而挽頽風
至於著名之匪未聞認真查拏一犯庸劣之吏未見據實
詳揭一員此亦難期稱職

臣蒙

飭查參奏決不敢稍涉遷就謹據實直陳應否將該臬司
方濬頤卽行革職以示懲儆而勵官常之處伏候

聖裁所有遵

旨查覆緣由謹恭摺具奏伏乞

皇太后

皇上聖鑒訓示謹

奏

報銷都江堰工用款摺

光緒五年閏三月十七日

奏爲查明修理都江堰工用款造報核銷恭摺具陳仰祈
聖鑒事竊據已革川東道丁士彬轉據已革前署灌縣知
縣陸葆德詳稱都江堰年久失修外內各江身淤塞一片
分水各魚背及人字等隄並兩岸隄埂橋座均殘缺朽敗
上年籌款興修計自光緒三年十月起至四年四月止先
後兩次共發九七三平銀十二萬九千九百四十五兩六
錢零六釐八毫內有光緒四年分例發歲修銀四千九百
二十餘兩一併在內現計挑挖外內江工段牽算共長七
十里共計土方四十萬零六千六百四十四方四分六釐
共實支夫工銀四萬零六百六十四兩四錢四分六釐修

砌外內各江石埂一萬二千七百六十四丈四尺共實支
石價夫工銀二萬四千零四十九兩四錢一分又外內江
各處用過三丈長竹籠一萬九千零一十七條連背石裝
籠工價共實支銀七千三百零五兩五錢一釐又修理魚
嘴三道共實支石鐵木各料及工價銀一萬二千四百三
十八兩七錢二分一釐七絲六忽又伏龍觀車水工價銀
一百二十一兩八錢六分又置買石灰四百四十七萬七
千八百三十七觔共實支銀六千二百六十八兩九錢七
分一釐八毫又擡石運木實用夫三千七百六十九工共
實支工銀三百三十九兩二錢一分又修復人字隄身長
一百三十丈連湃水口及飛沙堰湃水口共實支工料夫

價銀二萬二千三百四十五兩四錢一分三釐五毫四忽
又修理千金隄東西兩岸石埂共實支銀三百二十九兩
四錢又修復索橋石礮及普濟橋一座共實支工料夫價
銀五千六百二十七兩一錢零一釐四毫二絲四忽又內
外江截水夫工及應用竹木石料共實用銀一千一百一
十五兩九錢零二釐又採辦河工應需雜物器具及種樹
護隄等項共實用銀一千三百六十六兩五錢二分又辦
工委員薪水書役工食及雇用陝西飢民幫工口食賞恤
共實支銀七千七百九十五兩四錢四分又開工完工祭
神及油飾河神廟工等項共實用銀一百七十七兩七錢
一分通計共實用銀十二萬九千九百四十五兩六錢零

六釐八毫均係實支實領取有各行戶夫工人等收領票據呈驗並無分毫浮冒惟查川省向辦堰工僅土方竹籠等項有歲修報銷成例可遵此外石木灰鐵各項川省向無辦過河工成案實無一定例價上年興修堰工除挑挖河身土方並竹籠等項遵照歲修成例辦理外其餘應用木石鐵灰各項無一定例價者只得照民價核實承買此次報銷應將實支實用數目造報復查定例修造工程若因物料運腳價值昂貴今昔情形不同准承辦官於請銷時隨案切實聲明以憑查核等語今修辦都江堰工所有木石灰鐵各項雖照民價承買核計仍較例價爲輕應並聲明等情詳請奏咨前來

臣查都江堰工當日履勘情形

其河身淤塞隄埂殘廢實屬不堪言狀民間受害甚深工難暫緩當時飭委員再三估計以外內江均未截水江底未能現出深淺實難確估而數十里內一切隄工無不殘廢工費較鉅其一應工價又均無成例可循當經丁士彬等稟商先擬籌撥銀五六萬兩撙節興辦如實有不敷再行續估籌撥臣當時詳審全河工段縣長已至七十里又加以各魚背人字隄等工用款較多斷不敷用而四年分應領歲修及向來每年尙有照案加增之款尙須請領爲數亦鉅當卽約計一併籌撥銀九萬兩由司飭發丁士彬等認真興辦又以司庫款項難籌因商之藩司查明各州縣已清交代項下應行領回之雜捐等款尙寄存司庫暫

可動用卽就此款借撥暫將土貨釐金撥抵事後由本省攤捐歸還釐金不動正款均經奏明在案嗣外江各工完竣後截水興修內江查看隄身朽敗益甚而人字隄三十丈以下之舊隄一百丈全行蕩廢僅存痕迹必須修復以還舊制其時該處紳民公議請將人字隄臨水前面改用石工以期堅實工費較煩而江身淤墊較外江尤高通計工用實不敷銀三萬九千兩經陸葆德稟由丁士彬轉請續行籌撥以資接濟臣以初次奏撥銀九萬兩已經切實聲明係借用各屬交代應行領回雜捐等款暫借釐金抵補事後由本省自行攤捐歸還不動正款此次工需緊要必須續撥仍應查照前奏暫行由交代釐金借撥事後一

併由本省自行攤捐歸還不得動用正款並應暫緩續奏致滋煩數俟辦理奏銷時再行詳悉聲明當經飭司仍由交代釐金項下暫行借撥給領事後一併由外攤捐歸還以濟急用現計此項工程兩次共撥銀十二萬九千九百四十餘兩其四年分照例應領歲修銀四千九百二十五兩亦在此內覆查所辦各工毫無浮冒應准核銷惟人字隄一節計應銷銀二萬二千三百四十五兩四錢一分三釐五毫四忽本係實支實用但既經盛漲衝刷例應罰賠復查川省歷辦堰工成案凡修辦隄工若水勢在寶餅口水則十六晝內衝損者應惟承辦之官吏工頭罰賠若在水則十六晝以上者准免此次隄工被衝實係異常大水

沒過水則照川省向辦成案應准免賠惟旣被衝刷究屬
修工不堅臣已將此款全行刪除仍令丁士彬陸葆德分
賠飭限兩年交清不准開銷以昭核實計除刪賠外實只
應銷銀十萬二千六百七十五兩一錢九分三釐二毫九
絲六忽臣提驗陸葆德發給各行戶工役一應支領各款
皆有印領票據呈查均係實用實銷毫無浮冒相應據實
奏明並咨部查核至此大原奏動用工需及續撥之款均
係借支各屬交代存司應行領回之雜捐各款暫撥釐金
抵補事後一併由外自行籌捐歸還本未分釐動用正款
然亦應查照趕緊籌還以免虛懸惟查川省修辦堰工自
雍正三年議定歲修銀一千九百二十餘兩道光末年又

續增銀三千七百二十餘兩至咸豐十年以後則每年加增銀四五六千兩不等係由司庫捐輸項下墊支歷未奏咨有案三年臣到任後飭司確查計自咸豐十年截至光緒二年止司庫實墊發銀十萬三千九百九十八兩零至今尙未歸補清楚溯查當初墊發之時原議由用水之十數州縣按年分攤彌補嗣以地段縣長工難徧及以歲定四千九百餘兩之工程每年加增至一萬餘兩而江身日益淤隄身日益壞江水則年年橫流衝刷糧田少則數千畝多則數萬畝因之民力拮据應行攤還之款民間攤派爲難以致庫款日久未清臣現在飭司嚴行催追以重款項至此次奏明借用州縣交代應領存款暫借釐金撥抵

事後由外攤捐歸補若仍照前分攤之用水各州縣則前攤未清亦恐日久延宕亟應切實籌畫一定之款俾資迅速現與藩司熟商所有此次借撥交代領款暫借釐金抵補銀十二萬九千九百四十五兩六錢零應除去四年分例應請領歲修銀四千九百二十五兩仍照常年成案辦理無庸另行籌還又除刪賠人字隄一款不計外實只應自行籌還銀十萬二千六百七十五兩一錢九分三釐二毫九絲六忽茲議定由本省各屬自行酌捐養廉並於每年通省公捐之緝捕賞需預籌經費兩項三共勻攤出銀二萬兩按年歸還借款卽自本年冬季爲始定限五年至光緒九年還清不准逾限其每年歸還二萬兩之數應於

年終咨報以憑查核如此切實辦理既於庫款無涉且亦不致蹈從前有借無還之故轍至以後歲修款項臣於此次大修後已酌定仍按雍正道光年間所定四千九百餘兩之數支發其咸豐十年以後遞年加增之款一律停止不准再行濫支如遇工需喫緊有必應加增之處應行核實奏明辦理以杜冒領此中每年節省實多至此次報銷工款現除去光緒四年分應領之歲修一款暨人字隄工刪賠一款應毋庸籌還不計外所有原奏借撥及續行借撥各銀兩現均係全數由本省自行籌捐歸還未經動用庫款與他項河工動支正款請銷者不同應請

敕下部臣查照分別辦理除將清冊咨送外所有造報都

江堰工實用銀兩各緣由謹據實陳奏伏乞

皇太后

皇上聖鑒訓示謹

奏

遵 旨查訊竈民呈控官運虛誣摺

光緒五年四月初五日

奏爲遵

旨查訊竈民呈控官運各款概係虛誣原告多係竊名現在查明在逃妄控之劣紳緝獲審辦恭摺仰祈

聖鑒事竊 臣前准軍機大臣字寄光緒五年二月二十八

日奉

上諭恩承等奏川省官運局經竈民呈控多款著丁寶楨按照所控各節確切查明嚴剔弊竇體察商情或應仍由官運或應改官督商銷據實具奏不准稍涉迴護該竈民等原呈著該督向恩承等咨取閱看等因欽此遵卽恭錄諭旨咨明恩承等將竈民陳湖光等原呈粘單咨送前來

臣查閱原詞係富順職員陳湖光易大成王錫章李崇文劉向榮張如金曾玉峰七人及世新儀生源遠世興和生富慶六竈出名具控而臣署並無此案隨檄委同知李中敷馳往富順詳細查訪並傳該原告來省以憑質訊去後嗣據該委員具稟連日督同富順縣知縣陳錫鬯查訪差傳該縣並無原告陳湖光易大成王錫章李崇文劉向榮張如金曾玉峰其人亦無世興和生富慶三竈惟有世新儀生兩竈係廠紳王余照卽王朗雲及其姪王健如所開該竈戶早已逃避出外祇將開設源遠竈竈戶劉永清一名傳到據供伊開竈有年從未上控此次是他人竊名並不知縣屬有陳湖光等七人及世興等竈惟聞世新儀生

兩處竈戶王余照王健如叔姪逃外遠出料係王余照竊名上控求緝獲質究等語李中敷恐係一面之詞復會同委員候補知府周錫齡傳齊自流井廠五壩首事蕭憑修王瀛五壩保正王余薰井竈上珍竈等逐一查訊僉稱陳湖光等七人並無其人亦無世興和生富慶三竈惟有世新儀生兩竈係廠紳王余照叔姪所開等語並出具切結存卷周錫齡等又傳集商竈李泰興等六十六家到案逐一查訊據供稱官運局開設年餘向各竈戶購鹽作價一秉至公毫無剝削苛求抑勒威逼情事大小竈戶無不相安銷鹽倍於往歲奸商不能居奇貧民實深感戴伊等清查各竈除王余照叔姪在逃未回外別無作詞上控之人

井竈各戶亦無陳湖光等七人姓名暨世興和生富慶三竈該委員復按照原呈逐條詳詢僉稱或並無其事或與官運局無涉惟王余照去年摻售泡膽劣鹽被官局查實將號夥游姓枷示衆所共知隨各投具供結懇求委員轉遞又據該廠兩儀竈戶許義興恆升益竈戶李守先等復以呈明免累等情具呈投遞來案經周錫齡等傳訊該竈戶等均供民等在廠燒竈安分營生毫不妄爲此次捏控官局實係王余照所爲闔廠共知伊現遠逃俟將拏獲到案再行質訊等語該委員當卽攜帶原結原稟並將原呈有名劉永清一名隨帶到省臣督同委員按照原控十款親提當堂逐條研訊據源遠竈戶劉永清供稱原控內餘

慶竈號係陳鄧兩姓夥辦並非官運局員所開有該號火井佃戶吳全太等可質又如原控官運局與竈戶交易剝削威勒竈民歇業減竈官局罪以把持發勇拏辦一條據供官局買鹽發價與該竈戶交易多次與衆竈戶均照時市公議定價眼同登簿官竈兩願定立合同實無刁難勒逼如有剝削受害情事伊與衆竈戶豈肯代爲隱瞞上年富廠煎燒巴鹽之鍋止數百口近因官運暢行添至一千數百口實係有加無減何得妄稱歇業至去年因王余照所燒衆生各竈剋減工匠煙錢致激事端經白縣官到廠勸諭照舊定價了事並無一勇到廠原控捏稱總局發勇千餘到廠拏人所拏之人係何姓名原呈均不能指出一

人足見虛誣又如所控駝戶中途偷鹽易筋官勒竈戶賠
還及縣委傳訊竈戶責以筋子過重鹽有滲膽溼化勒具
賠結一條據供聞王余照所燒衆生兩竈向燒劣鹽滲膽
流水商難領銷去年被官局查實訊明將竈夥游姓枷責
並發還原鹽追繳成本此王余照自己作弊欺官騙商豈
能歸咎於官至竈戶裝鹽竹筋向規祇重五筋近來有加
至五筋數兩至六七筋者官局令竈戶概復五筋舊規實
爲公允其駝戶中途偷鹽短秤委員仍爲駝戶是問並無
責令竈戶代賠之事又如所控竈戶不敢改燒花鹽及官
局勒減巴鹽價值一條據供去年楚岸暢銷之時各竈戶
將燒巴鹽之鍋改燒花鹽共數百口官局並不過問從何

通勒又貴州一岸全銷巴鹽竈戶本不能不燒至花巴鹽價隨時漲跌無定去冬官局所買巴鹽每引發價至一百三十餘兩並無勒定一百一二十兩之事又如所控官局買鹽雖明定期限屢催不捆致各竈堆積停煎一條據供河流通暢官運毫無停滯如當水枯船缺之時不但官局暫時停捆不能如期卽商人自運之鹽亦都堆積不捆必待水漲船多方能捆運官商事同一律並非官運故意稽緩又如所控官局每月議價先擇燒鹽極劣之竈買一二張勒衆竈戶照價書票及發竈之銀多用九七八平勒升平水一條據供官局每屆買鹽之時必擇定日期齊集衆竈戶公議定價從無照劣鹽定價之事如有此議何以衆

竈戶毫無聞見至川省民間買賣通用九七八平九九色無用庫平庫色者官局何能勒升平水實無其事等語臣查川省鹽廠買鹽向係市平市色交易實無所謂庫平其官運購鹽仍不肯壞商行舊例以防病商故買鹽仍照各廠市平發給至銀色則官局均發庫色較市色成水爲高是以竈商均各樂從至所積平餘仍係購鹽售鹽一出一入應得贏餘湊積成數現已另立專條奏明撥作通省道府公費此銀係各局自行節省湊集之事尤與竈戶無涉至富順小河運行鹽船定爲官先商後原因河道甚窄所以防各船擁擠撞磕損溺之弊使依次銜尾而進旁無阻礙則運行更爲妥速水枯之時築堰瀦水以濟行舟隨時

啟放何至淹及稻田河中大小各船向任官商自行分雇並無官六商四之議船戶羅觀委員查明係屬病故並非服毒自盡至鹽包觔重係道光三十年原任督臣徐澤醇於清釐鹽務案內奏定花鹽每包連皮索重二百觔巴鹽每包連皮索重一百六十觔嗣因商人舞弊夾私逐年暗加重包重至三百六十觔甚至四百觔不等係屬違禁犯法例應治罪之事乃原呈輒以三百六十觔爲定章實屬膽玩並以從前富廠引釐二十五兩渝釐三十七兩爲輕以現在富釐遞減至十八兩渝釐遞減至二十五兩爲重其怪誕荒謬肆行欺罔尤屬顯然至邊計號商赴局繳銀領鹽均有定限該商等資本有限有利則行無利則止焉

能長支數萬之多如謂官局逼勒何以一載以來邊計商人默無一詞且均踴躍領銷刻下惟以官運更改有妨生業爲慮紛紛赴局請示且邊計各商遠在各岸分局領鹽繳價實與富順燒鹽之竈戶杳不相涉如果有不便於商之處早已自行呈訴無庸竈戶代爲捏告似此無故竊名捏控查訊情節種種虛誣藐法玩公莫此爲甚現據劉永清當堂親書供詞畫結及委員來稟均稱此呈實係富順縣劣紳王余照因去年燒壞鹽敗露挾官運局委員查實後枷責伊夥游姓之嫌竊控洩忿畏審遠逃事實有因臣復加訪查王余照又名王朗雲歷以運售楚岸花鹽夾私漏釐致成巨富咸豐年間在原籍富順縣犯事受刑隨朦

捐候選道員交結官紳魚肉鄉里遠近切齒同治七年七月以抗阻井捐經前署督臣崇實奏參革職拏辦潛逃嚴緝未獲嗣乘崇實交卸督篆朦朧開復自此愈無忌憚恃其豪富橫霸一方欺陵鄰里把持井廠並私抽鹽釐闖廠商竈民人畏之如虎紳民控案甚多前經李春霖李吉慶張永發等赴臣署具控該劣紳私抽井釐數萬兩估奪民妻並控有廣行賄賂交通京外等語情節甚重臣當飭鹽道委員行提來省審辦而王余照竟敢抗違不到委員實無如何復經臣將該劣紳奏參革職嚴提在案茲復無端竊名捏控冀圖上撓

國計以遂其豪霸之習實爲桀驁之尤除再委員勒提並

通飭各州縣嚴拏獲解審辦暨將訊被竊名實不知情之源遠竈戶劉永清先行發回該縣取保候質外所有遵旨查訊各緣由理合先行恭摺覆奏伏乞

皇太后

皇上聖鑒訓示再鹽務辦理官運實已大著成效現在詳察商情均不願更改前經分晰奏陳在案合併聲明謹奏

遵

旨覆陳都江堰工並無浮冒摺

光緒五年四月初五日

奏爲遵

旨據實覆奏恭摺仰祈

聖鑒事竊臣承准軍機大臣字寄光緒五年閏三月初九日奉

上諭據恩承童華奏稱丁士彬承修都江堰工程此項隄工支發帑項先據該員等稟請發銀五六萬兩丁寶楨卽奏請動用銀九萬兩嗣據稟請續奏籌撥該督並不奏明輒批令籌撥銀四萬兩統計提用銀十三萬兩等語工需均關國帑自應力求覈實此次動用銀兩何以前後數目懸殊有無浮冒情弊卽著丁寶楨據實覆奏不得稍有含

混一面懷遵前旨將工程銀兩迅速造冊報銷欽此跪誦
之下仰見

聖主實事求是莫名欽悚伏查都江堰年久失修江身淤
塞水勢橫流每至夏令江水稍漲淹沒民田動卽千萬畝
至盛漲則不可思議臣此次修理注重在挑挖三江淤塞
之河身修復兩岸殘廢之隄埂其各分水魚嘴人字隄並
各橋座乃係修理中之一節未可爲全河之工程也至動
用工需前丁士彬稟請籌撥銀五六萬兩臣卽奏撥九萬
兩者實因當日親履查勘全河情形不堪入臣先令委
員等沿江丈量應行挑挖淤塞河身縣長計七十里而兩
岸殘廢應修隄埂亦如之其各分水魚嘴人字隄橋座等

工爲數亦多隨飭切實估計工需該委員等以修辦堰工
必須分先後截水如先修外江必將外江之水截歸內江
後修內江必將內江之水截過外江辦理不能同時截水
則工需卽不能同時估計丁士彬等以兩次截水工難確
估而遲緩又恐貽誤因擬力求撙節稟請先行籌撥銀五
六萬兩開辦如後有不敷再行續請籌撥臣以目前查看
應挑河身計長已至七十里此外尙有應修之隄埂人字
隄魚背橋座各工均應及時興辦五六萬兩之數斷不敷
用因查明堰工尙有年例歲修應領及盛漲時搶險續增
之款約銀一萬餘兩當將此項併計再爲添撥銀一萬數
千兩共計籌撥銀九萬兩飭發先行辦理當經據實具奏

並將此項銀兩司庫無款可籌係在各州縣交代存司應
領項下借用暫將釐金抵補事竣仍由外自行勸捐歸還
釐金不動分釐正款均於摺內聲明在案此初次奏報銀
九萬兩之實情也至續撥之款未及奏明者係因外江工
竣後截水興修內江經委員等查看內江淤墊較甚外江
而人字隄之三十丈一經水涸現底查看已全形朽壞其
三十丈以下尚有舊隄一百丈亦早全數衝刷僅存痕迹
必應從新修復以還舊制工費已覺有增而其時灌縣紳
民又公議請委員陸葆德轉請將人字隄一段改鑲石工
冀資經久費益加多丁士彬等見工費實有不敷乃稟請
續行奏撥銀四萬兩以濟急用

臣以前撥工需不敷早經

計及自應續撥以竟全功惟查前次奏撥銀九萬兩係聲明不動正款借用交代釐金事後應自行勸捐歸還此次續撥仍應照前辦理似可暫緩具奏俟將來奏銷時隨案聲明以免煩瀆當批飭照辦並續行籌發銀三萬九千數百兩飭領應用此二次續撥銀兩未及奏明之實情也查臣此次修辦都江堰工通計用銀十二萬九千七百餘兩內除年例應領歲修銀四千九百餘兩係有專款外其另行籌撥之款實祇銀十二萬四千八百餘兩而修復人字隄一段實祇用過銀二萬二千三百數十兩此外挑挖河身七十里及修復兩岸隄埂並各分水魚嘴各橋座工程多於人字隄數倍而所用之銀均祇此數是前後撥銀十

二萬九千數百兩係辦理都江堰全河工程非專在人字隄一段也前恩承童華所奏似以此項銀兩專指人字隄一段而於挑挖河身修復隄埂魚嘴橋座各工均未敘及遂覺動用銀兩數目前後懸殊其實工大費煩紳民共見實未敢稍涉浮冒况臣素於庫款尙知慎重如委員等偶有不實臣亦必查明嚴參決不稍爲姑容至臣續撥款項未及奏明者實因初次奏撥銀九萬兩聲明係借用交代以釐金抵補事後仍由外自行攤捐歸還不動正款則續撥之款自可照前辦理暫緩具奏以免煩瀆且查川省辦理堰工所有頻年續增之款均係借動正款事後由外攤還向未具奏有案此項事同一律擬爲援照辦理以致一

時冒昧失於陳奏實非敢於含混自干咎戾欽承
垂詢惶悚至深現在此項工程銀兩前因人字隄一段查
有衝刷已將用過之銀二萬二千三百數十兩全數駁刪
飭令丁士彬陸葆德等分成分限著賠應毋庸議外其餘
各項已遵前次

諭旨造報於閏三月內將一切工段用款詳細分晰陳奏
並將清冊咨部核辦所有都江堰工銀兩前後懸殊實係
工鉅費多並無浮冒各緣由謹據實恭摺覆陳伏乞

皇太后

皇上聖鑒訓示謹

奏